

Noticia  
Transparente  
di Gobierno

# ISLA ONLINE

Diamars 19 Maart 2024

Email: [IslaOnline@gobierno.aw](mailto:IslaOnline@gobierno.aw) Tel: 528-4952



**STABILIDAD  
Y  
PROSPERIDAD**  
2 0 2 4

**Gabinete Wever-Croes**





PROME MINISTER

Evelyn Wever-Croes



## FUNDACION PARKE NACIONAL ARUBA A PERDE E CASO CONTRA GOBIERNO DI ARUBA

Fundacion Parke Nacional Aruba (FPNA) a cuminsa un caso contra pais Aruba y contra desaroyador di Isla di Oro pa stop e desaroyador di haci cualkier trabou di limpieza riba su tereno.

Den esaki FPNA a demanda Pais Aruba tambe pa prohibi Pais Aruba duna permisonan. Den su veredicto,

mesora, hues a indica na FPNA cu como nan tin e maneho di e area, cu FPNA y e doño di Isla di Oro mester bay sinta na mesa y sali di e problema.

Mientrastanto hues a prohibi e doño di Isla di Oro pa desaroya of hasta pa haci limpieza riba su tereno di Isla di Oro.

Pa loke ta e demanda di FPNA contra Gobierno di Aruba, FPNA a perde esaki. Hues a bisa cu no tin base pa prohibi Gobierno.

Ta trata aki na un tereno cu e doño tin den erfpacht. E area ta bou maneho di FPNA como un area protehi. Den areanan protehi en general por restablece un edificio na estado original, den consulta cu FPNA.





## EMBAHADORA Y CONSUL DI BELGICA A REUNI CU PROME MINISTER

**A enfoca riba e amplio  
posibilidadnan pa  
diversificacion di e economia  
di Aruba**

Diabierna atardi 15 di maart, Prome Minister Evelyn Wever-Croes a reuni cu e Embahadora di Belgica na Den Haag, Hulanda, señora Anick Van Calster y e Embahador di Belgica na Colombia y tambe Consul General di CAS (Corsou, Aruba y Sint Maarten) y BES (Boneiro, Sint Eustatius y Saba), señor Bert Schoofs.

E embahadornan ta na Aruba pa topa cu e comunidad di Belgica residencia na Aruba cu ta aproximadamente 200 persona, pero principalmente e bishita na Aruba ta pa estrecha y mehora aun mas e lasonan entre Belgica y Aruba. Actualmente Aruba tin un laso fuerte cu Belgica pa motibo cu e facultad tecnico nobo di Universidad di Aruba SISSTEM ta traha den cooperacion cu KU Leuven, e universidad di Leuven, Belgica.

Esey ta trece Belgica y Aruba hopi mas cerca di otro y asina ta crea mas y miho oportunidadnan pa Aruba.

Otro echo di e bon relacion cu Belgica ta cu na e pais tin varios estudiante Arubiano y tambe Aruba ya di basta tempo tin lasonan comercial fuerte y solido cu Belgica.

“Un reunion hopi fructifero unda a enfoca riba e posibilidadnan grandi cu tin cu e pais Europeo aki y asina yuda Aruba tin mas diversificacion di su economia pa nos economia por sigui crece y por ta mas fuerte y resiliente”, Prome Minister a remarca.







## PROME MINISTER A ATENDE REUNION CU E CUERPO CONSULAR PA ARUBA

**"Di curason nos ta gradici boso pa boso sosten y cooperacion den e desaroyo economico di pais Aruba"**

Diadomingo ultimo, Prome Minister Evelyn Wever-Croes tabata presente na e reunion cu e Cuerpo Consular pa Aruba. Durante e mainta aki, Prome Minister a duna su discurso na unda el a enfatisa e papel importante cu cada representante di e cuerpo diplomatico, y di e consular pa Aruba ta hunga, no solamente den establece y mantene e vinculo politico y economico cu Gobierno di Aruba, sino tambe den protehe e interesnan personal di nan nacionnan na Aruba.

Tambe, Prome Minister a yama un bonbini na señor Gustavo Cerano Amalia, Consul di Colombia, y señor Elludis Perez Delgado, Consul di Republica Dominicana, y despues di un lapso di siete aña, e consul honorario di Jamaica na Aruba, señor Donald Taylor cu a wordo acredita dia 18 di Juli 2023. Ta importante pa menciona, cu recientemente Gobierno di Aruba a ricibi un peticion

for di autoridadnan Portugues pa establece un consul di Portugal na Aruba, di cual peticion actualmente ta den proceso.

Premier Wever-Croes a expresa di ta sumamente honra cu asina tanto nacion ta reconoce e balor y importancia di e relacionnan diplomatico entre nos nacionnan, pa asigna consulnan y consulnan honorario pa Aruba.

Manera ta conoci, Aruba ta un di e islanan cu mas a wordo afecta pa e pandemia di Covid-19, pero tambe e isla cu mas lihe ta recuperando. E compromiso di Gobierno ta pa no solamente "bounce back" sino pa "bounce forward" y crea asina un Aruba mas fuerte y resiliente. Segun e ratingnan di IMF, Aruba su recuperacion ta imprecionante, economia a crece, e GDP a yega na nivelnan di prome cu pandemia y ta sigui crece, finanzas publico ta na nivel responsabel y sostenibel, y Aruba ta e unico pais den Reino cu a logra un surplus pa di dos aña consecutivo. Tursimo ta bayendo bon, desempleo a disminui, y por ultimo, Aruba a wordo menciona pa "The Telegraph UK" como e pais mas sigur den Caribe.

"Manera por mira, Aruba ta bayendo den bon caminda, y tur esaki ta danki na cada un di boso cu a y ta kere den nos den bon tempo y den tempo menos bon. Di curason nos ta gradici boso, pa boso sosten y cooperacion den e desaroyo economico di pais Aruba. Ta solamente uni, nos por logra cosnan grandi, y esaki ta bisto danki na bosonan", Prome Minister a expresa.





POTRETNAN  
REUNION CUERPO CONSULAR







## Di tur skina di Aruba a bin celebra E FERIA CULTURAL DI COLEGIO NIGEL MATTHEW CELEBRANDO NOS DIA NACIONAL

Diabierna anochi 15 di maart, Colegio Nigel Matthew na San Nicolas un biaha mas tawatin un celebracion enormemente bunita den cuadro di Dia di Himno y Bandera cu nan feria cultural. Prome Minister Evelyn Wever-Croes presente pa e ocasion aki y acompaña pa Minister di Cultura Xiomara Maduro y Minister di Enseñansa y Deporte Endy Croes, por a experencia e gran interes cu tawatin pa e feria aki.

Ya di trempan e luga a cuminsa yena y e publico tawata bishita tentnan bendiendo entre otro cuminda tipico, cos dushi y artesanía local. Durante un ambiente masha ameno por a wak varios interpretacion cultural y musical masha bunita di alumnonan. Tambe tawata un momento cu hopi emocion pa Prome Minister ora e por a topa atrobe cu señor Nigel Matthew ken den pasado tawata un profesor di dj'e na scol.

Prome Minister a felicita Colegio Nigel Matthew cu e bunita celebracion y a gradici nan pa sigui inculca den nos alumnonan e amor pa nos cultura.

“Den cuadro di e celebracion di Dia di Himno y Bandera nos ta para keto naturalmente na nos simbolonan patriótico, pero tambe na e amor pa Aruba, e amor pa cultura, y e forma cu Colegio Nigel Matthew ta celebra esaki y e forma cu hendenan di tur skina di Aruba ta bin pa celebra hunto cu nan, ta muestra cu e trabou cu nan ta haciendo ta uno sumamente valioso. Pabien Colegio Nigel Matthew cu e celebracion aki”, Prome Minister a termina bisando.





POTRETNAN  
FERIA CULTURAL





# CU UN MARCHA CULTURAL YENA CU CREATIVIDAD ST. PAULUS SCHOOL A INICIA E CELEBRACION DI DIA DI HIMNO Y BANDERA

## Un marcha bunita y cu hopi ambiente

Diabierna atardi dia 15 di maart, e pueblo di San Nicolas y Aruba en general a disfruta di un bunita marcha cultural presenta pa St. Paulus School. Durante e atardi aki Prome Minister Evelyn Wever-Croes y colega minister Xiomara Maduro tawata presente y a keda hopi contento

y inspira cu locual e muchanan a trece dilanti durante a marcha aki.

Prome Minister expresa cu el a keda impresionado cu e beyesa di e marcha pero principalmente cu e creatividad y e temanan cu a scoge pa e marcha aki. A trata di nos turismo, di e desaroyo economico di San Nicolas y di henter Aruba.

Muchanan hopi contento y anima a representa e cultura di nos dushi isla bailando y gozando durante e marcha aki. Prome Minister ta felicita Meneer Randy y henter su ekipo di docente, tur mayor y voluntario y specialmente e muchanan, cu a haci nan maximo esfuerzo pa e marcha aki tawata un exito total.

"Esaki tawata un manera bunita pa cuminsa cu e celebracion di e fin di siman di Dia di Himno y Bandera. Pabien y danki pa sigui inculca den nos muchanan e amor pa nos pais, nos cultura, nos bandera y nos himno, pasobra ora muchanan ta lanta cu e amor aki den nan curason, mayan nos sa cu nan lo sigui cuida y stima Aruba. Danki y pabien!", Prome Minister a expresa.







POTRETNAN  
MARCHA CULTURAL







## MINISTER XIOMARA MADURO A CELEBRA CU NOS GRANDINAN DI SAN PEDRO PAVILJOEN

Siman pasa diabierna, riba Dia Internacional di Hende Muhe, Minister di Cultura a pasa bishita nos grandinan

di San Pedro Paviljoen pa comparti un rato protocolar hunto cu nan.

Den un ocasion protocolar, nos grandinan a disfruta di unrato ameno hunto cu e mandatario, cu tabata den compania di Minister-President Evelyn Wever-Croes y colega Minister Endy Croes. Tabata tin presentacion di Edjean Semeleer cu a deleita nos grandinan cu canticanan di nan tempo, tabata tin dushi pasa boca cu a duna un toke special na e dia aki.

Minister Maduro ta gradici tur esnan cu a haci e bishita aki posibel y ta gradici nos grandinan di San Pedro Paviljoen pa permiti'e comparti un rato cu nan.





POTRET NAN  
CELEBRACION SAN PEDRO PAVILJOEN





# DISCURSO DI MINISTER XIOMARA MADURO DI CULTURA NA OCASION DI E MANIFESTACION CULTURAL PA CELEBRA DIA DI HIMNO Y BANDERA 2024

## ARUBA, ORGUYO DI NOS TUR!

E aña aki nos ta celebra cu 48 aña pasa cu e bandera di Aruba a bay laira pa prome bes bou di tononan di nos Himno 'Aruba, dushi tera' durante un manifestacion den stadion Wilhelmina.

### ARUBA

Permiti mi scohe algun di e momentonan crucial cu nos pais a conocí den pasado na unda Pais Aruba a demostra esaki.

Na aña 1986 nos Libertador Betico Croes a sa di uni nos pueblo pa logra Aruba su Status Aparte y duna nos e herment necesario pa desaroya como pueblo y Pais.

Na aña 1985 cu e refineria Lago cu tabata e pilar di nos economia a dal cera su portanan, Aruba a uni un bes mas y transforma e pilar di economia di nos Pais, pa turismo.

Un otro prueba ta na aña 2020 na momento cu COVID19 a bati na nos porta y Aruba a resulta e prome Pais den region Caribe cu mas a wordo afecta pa e pandemia. Awe despues di cuater aña, Aruba ta figura como un di e prome paisnan cu ta recuperando satisfactoriamente economicamente y financieramente.





Esaki a wordo demostra tambe ultimamente den rapportnan di evaluacion di organisacionnan importante internacionalmente manera IMF, CFATF y tambe companianan di rating internacional, durante cual Aruba a ricibi evaluacionnan hopi positivo riba nos economia, finansa y tambe integridad financiero. Cu e resultadonan aki Aruba ta haya mas credibilidad pa inversionistanan inverti den nos pais. Tur esakinan ta motibonan cu ta haci nos orguyoso di nos Pais Aruba.

## ARUBA RIBA TARIMA INTERNACIONAL

Nos isla por ta chikito riba mapa mundial, pero rico na talentonan local. Hopi yiunan di tera a laga Aruba bira conocí den ramo di entre otro di beyesa, deporte, ciencia y arte. Nos curason ta yena cu orguyo ora nos mira nos bandera di Aruba y tende Aruba su nomber resona riba tarimanan internacional.

## NOS HENDENAN

Mi por menciona hopi mas motibo pa nos sinti nos orguyoso di nos Pais Aruba, manera nos herencia cultural, nos tradicionnan, nos monumentonan, nos playanan, nos naturalesa, nos carnaval, nos estabilidad político y nos seguridad.

Pero nos tin algo unico cu ta haci nos Pais special, cu ta NOS HENDENAN.

Nos hendenan ta e recurso mas importante di Pais aki. Nos hendenan cu apesar di nos diferencianan, sa di uni ora nos Pais mas mester di esaki, paso nos stima e pida baranca aki y ta pone tur diferencia un banda na bienestar di nos Pais.

Arubianonan of esnan cu a scohe pa haci Aruba nan hogar, ta biba den union cu otro, trahando duro pa progreso di nos Pais, ta e tesoronan di Pais Aruba.

Nos hendenan cu ta trata e turistanan cu cordialidad y amabilidad.

Manera e letranan di nos Himno ta bisa: Grandesa di nos pueblo ta su gran cordialidad.

Nos hendenan ta un di e balornan importante di Aruba, cu ta haci nos orguyoso di nos patria stima.

## BISHITA NA SCOLNAN

Den cuadro di preparacion pa e celebracion di nos dia nacional, durante henter e siman nos a bishita diferente scolnan preparatorio, basico y secundario rond di nos isla y tambe nos a presencia varios actividadnan cultural cu e muchanan y hobennan a organisa. Un danki na tur juffrouw, meneernan y docentenan cu ta yuda sembra e amor pa nos cultura den nos futuro generacion. Un otro motibo pa sinti nos orguyoso di Aruba.

## DANKI

Awe nochi ta un anochi pa celebra Aruba, orguyo di nos tur! Pa esaki mi kier a gradici Comision Celebracion Dianan Nacional y Departamento di Cultura pa organisa e Manisfestacion Cultural aki cu presentacion

di diferente artistanan, talentonan local cu ta demostra nan amor pa nos patria y cultura y tambe un show cu lo bay haci un recorrido riba tur locual ta pone nos sinti cu Aruba ta orguyo di nos tur. Un danki tambe ta bay na tur patrocinador cu a contribui cu e evento cultural aki. Un danki special na tur esnan cu awe nochi a bin pa duna aporte na nos Manisfestacion Cultural pa enrikese nos cultura cu benta di cuminda, cos dushi, cos di bebe y tambe artesanía. Masha Danki pa engradece nos evento cultural. Y sigur un danki pa nos publico cu presente y esnan cu ta sigui nos atraves di nos planta nacional.

## INVITACION

Mas cu claro un invitacion pa asisti mayan 18 di maart, nos día nacional, Dia di Himno y Bandera pa 9'or di mainta, durante cual e Acto Protocolar lo tuma lugar na unda nos lo brinda honor y respet na nos Himno y Bandera.

Bin presencia un bunita programa cu entre otro, presentacionnan di diferente ganado di e 'Festival Un Canto pa Aruba su Himno y Bandera', un aubade presenta door di nos muchanan di diferente scol, un bunita desfile di gruponan uniforma y tambe admira un otro show Aruba, Orguyo di nos tur' cu lo enfoca riba tur locual ta haci Aruba atractivo pa e turistanan.

E aña aki nos a registra un rekord di eventonan en conexion cu celebracion di Dia Himno y Bandera. Laga nos alsa nos bandera, pone nos banderín na auto, bisti nos t-shirt, canta nos 'Himno Aruba, dushi tera' cu hopi orguyo y den union di famia y amistadnan, bishita e eventonan.

Mi ta extende un invitacion special na nos bishitantenan di afo, pa haci un recorrido rond di nos isla y bishita e eventonan y experiencia asina un tiki di nos cultura.

Corda semper cu Cultura, bo tin cu bib'e y cu bo participacion nos ta sigui engrandec'e.

Nos ta hendenan dushi, orguyoso di ta yiu di e baranca aki, cu no tin nada pa kibr'e y tampoco pa igual'e.

Publico presente, ban hisa nos banderín, compañía mi y ban bisa hunto:

"Biba Aruba!"

"Biba Aruba!"

"Biba Aruba!"

Pabien Aruba, un abraso fuerte.

Pasa un Dushi y Feliz Dia di Himno y Bandera y cu Dios sigui drama su bendicion riba nos Pais.

# BAN SIGUI DISFRUTA DI NOS ANOCHI CULTURAL.





## **MINISTER DANGUI ODUBER** **A BIHITA DOS SCOL BASICO;** **COLEGIO FELIPE B.** **TROMP Y SANTA** **ANNA SCHOOL EN** **CONEXION CU NOS** **BUNITA CELEBRACION** **NA ARUBA DI 18 DI** **MAART**

Diaranson mainta Minister di Turismo y Salud Publico sr. Dangui Oduber conhuntamnete cu su colega Minister di Finanzas y Cultura sra. Xiomara Maduro a haci un bishita na dos scol basico, Colegio Felipe B. Tromp y Santa Anna School. Un bishita en conexion cu e celebracion nacional di 18 di maart.

E mandatarionan a haya un caluroso bon bini yena cu

energia hopi positivo. Nan a pasa un rato hopi agradabel cu tur e muchanan na tur dos scol. Ta importante pa sembra e simia di celebracion di nos dia nacional y amor pa nos Aruba den nos muchanan.

Di manera aki Minister Dangui Oduber a cuminsa celebra nos Himno y Bandera hunto cu e muchanan, pasando di klas pa klas. Un danki sigur na tur e maestronan cu a haci e dia aki posibel, tur e alumnonan di Colegio Felipe B. Tromp y Santa Anna school. Tambe un bunita regalito a wordo entrega na tur mucha y maestro cu e tema di "Stima Bo Pais, Stima Bo Bandera".

Minister Dangui Oduber a termina bisando cu e la pasa super great di mira tur e entusiasmo y energia positibo di e muchanan pa cu e celebracion di 18 di maart. Minister ta mira e importancia pa sigui siña y involucra e muchanan di trempan den nos cultura y nos bandera

**Ami ta Aruba, Abo ta**  
**Aruba, Nos muchanan ta**  
**Aruba!**





POTRETNAN  
BISHITA NA SCOLNAN







## **MINISTER ENDY CROES A PRESENCIA E BUNITA MARCHA CULTURAL DI ST. PAULUS SCHOOL NA SAN NICOLAS**

En conexion cu celebracion di Dia di Himno y Bandera,

St. Paulus School a organisa un bunita marcha cultural den e bario di San Nicolas. Minister di Enseñansa y Deporte Endy Croes y esposa Sra. Dilailah Croes tabata presente pa admira y gosa di e bunita marcha cultural cu tabata basa riba nos turismo, cual ta e desaroyo economico di Aruba. Un marcha cultural yena di energia, creatividad, color y ambiente. E alumnonan di klas 1 te cu 6a presenta un tema diferente entre otro, I love San Nicolas, Flora y Fauna, Nos ta Aruba, Nos Industrianan, Aruba su Historia y Turismo y Mi Compromiso cu Aruba. Minister Endy Croes a gradici cabesante Sr. Randy Arends, maestro, mayor y tur cu a contribui pa haci esaki posibel. Alabes, e mandatario di Enseñansa ta felicita e muchanan pa nan creatividad y engrandece cultura di nos dushi Aruba.





POTRETNAN  
MARCHA CULTURAL







## WEGANAN ESCOLAR 2024 TA TUMA LUGA DI 1 PA 15 DI JUNI PROXIMO

Siman pasa, Minister Endy Croes a reuni cu e comision organizado di Weganan Escolar (WE). E comision ta consisti di representante di Ministerio di Enseñansa y Deporte y IBiSA. Manera ta conoci, na aña 2022 a reintroduci Weganan Escolar den un bachi nobo, cual a haya un acogida hopi grandi. Na aña 2023 e campeonato a crece mas ainda, alrededor di 1000 estudiante y 43 scol a participa. Pa 2024 lo sigui etala e competencia aki.

E meta di Weganan Escolar ta pa promove deporte bou di e alumnonan di scol preparatorio, basico y secundario. Deporte ta crea lider, fomenta union,

alegria y crea amistad. Tambe deporte ta trece positivismo y ta bon pa nos salud. “Deporte ta e vehiculo cu ta preveni pa e muchanan bay riba caya”, Minister Endy Croes a enfatisa. Hunto nos por logra un comunidad mas saludabel y activo.

E weganan di clasificacion entre e scolnan ta tumando luga y IBiSA ta encarga cu esaki. Durante e reunion a trata e vision, a scoge e fechanan y a prepara e draaiboek. E gran apertura ta tuma luga dia 1 di juni y ta clausura dia 15 di juni proximo. Dos siman deportivo unda e scolnan lo bataya contra otro pa conquista e titulo maximo. E reunionnan lo continua e simannan nos dilanti. E prome siman di april lo reuni cu e scolnan pa asina nan ricibi mas detaye y informacion actualisa di e competencia escolar.

“Pueblo di Aruba ta keda cordialmente invita pa e gran clausura di Weganan Escolar dia 1 di juni proximo”, Minister Endy Croes a conclui. Ban duna apoyo y sosten na nos hobennan!







# MINISTER ENDY CROES A DUNA COMISION DI ENSEÑANSA DI PARLAMENTO DI ARUBA UN AVANCE DI E PROYECTO DI MODERNISACION DI LEY DI ENSEÑANSA

Diaranson ultimo, Minister di Enseñansa y Deporte Endy Croes hunto cu director di Inspeccion di Aruba Sr. John Hessen, y Sra. Arlenne Wever Croes di Inspeccion di Aruba, director suplente di Departamento di Enseñansa (DEA) Sra. Sheila Maduro, Sr. Luutsen de Vries cu ta trek e proyecto aki y Sra. Lizara Williams di Directie Wetgeving en Juridische Zaken (DWJZ) a duna e comision di enseñansa di Parlamento di Aruba un avance di e proyecto di modernisacion di leyman di enseñansa.

Hunto cu e ekipo, e mandatario di Enseñansa a duna un introduccion completo di recomendacion 11 di e Doorlichting van het Arubaanse Onderwijsbestel. Manera ta conoci, despues di pandemia, Gobierno di Aruba a firma un protocol cu Hulanda. Inspeccion di Hulanda y Inspeccion di Aruba a haci un investigacion amplio y a produci un rapport cu diestres (13) recomendacion. Recomendacion 11 ta trata di renobacion di tur ley di enseñansa y traha leyman nobo cu tin mester. Leyman cu ta bay modernisa ta, entre otro LV di scol preparatorio, LV di scol basico y LV di scol secundario.

Banda di esaki, ta bay traha ley nobo pa Enseñansa Profesional, Enseñansa Superior (Hoger Onderwijs) y Speciaal Onderwijs. E ley di Landsverordening Onderwijstoezicht (LOT) cu ta rigi pa Inspeccion di Enseñansa ta cla y actualmente ta na DWJZ. Den e luna di juni Parlamento di Aruba lo ricibi esaki di DWJZ

pa wordo trata. Sr. de Vries, kende a skirbi e leyman di enseñansa a reuni cu diferente scol pa duna nan “input”.

E siguiente ley cu ta planifica pa entrega despues di e ley di LOT ta Ley di Enseñansa Profesional (Beroepsonderwijs). Den e luna di mei lo tin e prome “draft” y den e luna di juni lo reuni cu tur stakeholder pa nan duna nan “input”, pa asina en camina e trayecto aki.







## MINISTERIO DI LABOR TA DEN TOTAL PREPARACION PA ASISTI SECRETS DEN SU JOBFAIR NA CAMINDA PA SU GRAN APERTURA

Siman pasa e mandatario encarga cu Labor a reuni cu representantenan di SECRETS hotel kende recientemente a anuncia cu e aña aki lo ta habriendo su portanan na San Nicolas. Un hotel cu lo trece hopi desaroyo cu ne pa e pueblo di pariba. No ta solamente hotel, pero e efectonan secundario economico cu e proyecto turistico aki lo trece pa San Nicolas pa loke ta trata negoshi y comercio, ta brinda un perspectiva nobo pa pariba.

Premirando e desaroyonan aki, hunto cu DPL, EPE y Oficina di Gobierno na San Nicolas a reuni cu SECRETS pa prepara e feria laboral cu lo tuma luga na San Nicolas mes den cooperacion estrecho cu AHATA y San Nicolas

Business Association pa asina duna e pueblo di San Nicolas e prome oportunidad pa registra y aplica pa un trabou na e hotel aki.

Ademas di e progreso economico cu e hotel aki lo trece, ta conoci cu hopi baluarte hotelero ta di San Nicolas. Ademas, hopi di nos hendenan cu ta bibando na San Nicolas tur dia ta baha bay te Noord pa traha den nos hotelnan existente brindando nan miho servicio. Pa esun cu ta desea, awo tin e oportunidad pa traha 'den porta di bo cas'. Pa esunnan cu ta dificil yega te Noord pa motibo di transporte of pa motibo di yiunan chikito cu ta bay scol, awo tin e oportunidad pa por traha cerca di cas mes.

Ademas di esaki, manera Minister Glenbert Croes a anuncia anteriormente, "nos ta habriendo un Enseñansa pa Empleo na San Nicolas cu lo mester bay brinda e cursonan necesario dirigi riba e mundo hotelero y e industria energetico cu pronto lo ta desaroyando na San Nicolas tambe. Sea bo ta nobo den e mundo di horeca of ta desea di cambia di funcion, EPE t'ey pa brinda bo e oportunidad di (re)capacitacion cu lo amplia bo oportunidad pa por haya un trabou."

Animo ta grandi, perspectiva ta positivo. Nos ta trahando y logrando e miho pa nos pueblo di pariba, San Nicolas en especial.







POTRETNA  
REUNION JOBFAIR





# 2024

## AÑA DI STABILIDAD Y PROSPERIDAD



### Gabinete Wever-Croes

Arte di Muraya ta un expresion di creatividad sin limite cu ta transforma murayanan di San Nicolas den un galeria bibo cu ta conta historia, transmit emocion y tambe ta stimula e orguyo di un comunidad.

